

ওডারল্যান্ড বীর প্রতীক-এর জীবদ্দশায় শেষ জন্মদিনে লেখা কাইউম পারভেজের কবিতা

বিলহেলমাস ওডারল্যান্ড বীর প্রতীক

কাইউম পারভেজ

ওয়েকআপ ডার্লিং
দ্য ওয়ার হ্যাজন্ট ফিনিশ্ড ইয়েট।

আজো কি তুমি শুনতে পাও
শয্যাপাশে প্রিয়তমা জীবন সঙ্গীনির
সেই একই ভাবে একই প্রত্যয়ে সহসা উচ্চারণ?

প্রথম মহাযুদ্ধের আশীর্বাদ, দ্বিতীয়বারের বীর সেনানী
ক্রোধে আক্রোশে গর্জে উঠলে
টঙ্গী-র বাটা সু কোম্পানী
তোমার কর্মস্থলে।
সেই সুমহান একান্তরে, সেই আমার বাংলায়
তুমি ধ্বংসস্তম্ভের আড়ালে, গলিত শবের পার্শ্বে
সামরিক ছাউনী, শেরাটন পূর্বানী, রাজপথ মেঠোপথ
বাংকার, ট্যাঙ্ক আর 'বিচ্ছু'-দের ট্রিগারে।
কি অসম্ভব সাহসী অপ্রতিরোধ্য স্পর্ধা
সাংবাদিক কখনো, কখনো আলোকচিত্রী, কখনো গেরিলা ট্রেইনার
নয়তো ঝোপের আড়ালে 'অজি' মুক্তিযোদ্ধা আমার।
কি ভয়ানক সেই দিন - সেই তুমি।
স্যালুট বিলহেলমাস ওডারল্যান্ড বীর প্রতীক
সালাম - লহ সালাম।

যেখানেই নিপীড়িত মানুষের মুক্তির আর্তনাদ
ভৌগোলিক সীমানার কাঁটাতার ডিঙ্গিয়ে
হল্যান্ড ইয়োরোপ বাংলাদেশ-এ, তোমার সুতীব্র প্রতিবাদ।

ওয়েকআপ ডার্লিং
দ্য ওয়ার হ্যাজন্ট ফিনিশ্ড ইয়েট।

আজো কি তুমি শুনতে পাও
শয্যাপাশে প্রিয়তমা জীবন সঙ্গীনির
সেই একই ভাবে একই প্রত্যয়ে সহসা উচ্চারণ?
এশিয়া আফ্রিকা মধ্যপ্রাচ্য এখন
সর্বত্রই মুক্তিযুদ্ধের বিছন।

এইতো সেদিন ছয় ডিসেম্বর তুমি তিরিশি হলে
শ্রোকে নিস্তেজ তুমি, পার্থ-এর সেই হাসপাতালে
নীরব জন্মদিনটি কেমন পার করে দিলে।

তুমি কি জানো - হে 'অজি' ওডারল্যান্ড বীর প্রতীক
তোমার সেই বাংলাদেশ থেকে এক ঝটকা শুভেচ্ছার বাতাস
ছমড়ি খেয়েছিলো তোমার ক্ষত-বিক্ষত বুকটিতে।
তোমার জন্মদিনটিতে।

তোমার সেই বাটা কোম্পানীর 'বিচ্ছু' ছেলেরা
যারা তোমার সাথে যুদ্ধ করেছিলো এক আর দুই নম্বর সেক্টরে
তারা এই বিজয়ের দিনে তোমায় স্যালুট করবে - তুমি কি জানো?

ওয়েকআপ ডার্লিং হিরো
দ্য ওয়ার হ্যাজন্ট ফিনিশড ইয়েট।

তুমি কি জানো, 'জাতীয় পতাকা খামছে ধরেছে সেই পুরোনো শকুন'?
তুমি কি জানো, জাতীয় সঙ্গীতের কণ্ঠরোধে ধাবমান পৈশাচিক হাত এখন --?
তুমি কি জানো, ইরফান রাজাদের অশনি সংকেতে শংকিত বাংলাদেশ?
তুমি কি জানো বন্ধু, পাকি-প্রেতাত্মারা ষড়যন্ত্রের ট্রাফিক পুলিশ অবশেষ?
তুমি কি জানো, হে বীর প্রতীক - দাঁড়িয়ে ঠায়
তোমার বাটা-র 'বিচ্ছু'রা এখনো
তোমার কমান্ডের প্রতীক্ষায়!